

**Служба**  
**Преподобной Манефе Гомельской**



## Служба

### Преподобной Манефе Гомельской

#### НА ВЕЛИЦЕЙ ВЕЧЕРНИ,

на Господи, воззвах стихиры, глас 8.

**Подобен: О, преславнаго чудесе:**

**О, преславнаго чудесе! Преподобная мати Манефо, Крест Пречестный взявша, путем узким шествовала еси, и веры истинныя явилася еси проповедница, верныя во Православии утверждающая, немощным же помощь подавающая. Ея же молитвами, Христе, спаси души наша, яко Един благоутробен.**

**О, преславнаго чудесе! На небеси и на земли радость днесь в памяти возсия Манефы преподобныя: от ангел хвалами венчается, и от человек хваление приемлет. О, како добре подвизавшись, мощи своя в дар граду нашему дарова! Ея же молитвами, Христе, спаси души наша, яко Един благоутробен.**

**О, преславнаго чудесе! Преподобная мати Манефо, иноческим житием Богу угодила еси, веру непорочну и любовь нелицемерну соблюла еси, и всей стране Беларустей звезда пресветлая явилася еси, осиявающи чудесы всех, верою припадающих к раце мощей твоих. О, каковый дар земным даровася! Ея же молитвами, Христе, спаси души наша, яко Един благоутробен.**

**Глас 2-й. Подобен: Киими похвальными:**

**Киими похвальными венцы венчаем преподобную, вся красная мира любве ради Христовы презревшую, и во ангельском образе Небесному Царю послужившую, телесныя немощи терпеливно понесшую, и многия люди ко истинней вере приведшую; Ея же молитвами, Христе Боже, даруй нам мир и велию милость.**

**Киими похвальными песнями ублажим преподобную, плотию с нами сущую, и духовно всех достигающую, всех предстательницу и заступницу, и всех скорбящих утешительницу, / Церкви наша украшение, / благочестия столп**

и верных поборницу./ Ея же ради шатания врагов Христос низложи,/ имея велию милость.

**Киими песненными добротами восхвалим преподобную,/ Церкви Беларускай похвалу и украшение,/ монашествующих славу и верных удобрение,/ Православия укрепление,/ безбожных посрамление,/ заблудших вразумление,/ грешных исправление./ Ея же молитвами, Христе Боже,/ даруй нам мир и велию милость.**

**Слава, глас тойже:**

**Да радуется днесь земля гомельская,/ торжествует же Церковь Беларускай,/ священную память преподобных Манефы светло празднующе,/ се бо предстоя престолу Пресвятыя Троицы,/ прилежно молится спастися душам нашим.**

**И ныне, глас тойже:**

**Прейде сень законная, / благодати пришедши: / якоже бо купина не сгараше опаляема, / тако Дева родила еси / и Дева пребыла еси. / Вместо столпа огненнаго / праведное возсия Солнце, / вместо Моисея – Христос, / спасение душ наших.**

**Вход. Прокимен дне. И чтения три.**

**Премудрости Соломоновы чтение (глава 3):**

**Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их, и еже от нас шествие сокрушение; они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут: судят языком и обладают людьми, и воцарится Господь в них во веки. Надеющиися Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.**

### **Премудрости Соломоновы чтение (главы 5 и 6):**

**П**раведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение Свое и вооружит тварь в месть врагом. Облечется в броня правды и возложит шлем суд нелицемерен. Приимет щит непобедимый преподобие, поострит же напрасный гнев во оружие, споборет же с ним мир на безумных. Пойдут праволучныя стрелы молниины и, яко от благокругла лука облаков, на намерение полетят. И, от каменометных ярости исполнь, падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните, судии концев земли, внушите держащий множества и гордящийся о народех язык, яко дана есть от Господа держава вам и сила от Вышняго.

### **Премудрости Соломоновы чтение (глава 4):**

**П**раведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком и возраст старости – житие нескверное. Благоугоден Богови быв, возлюблен бысть и живой посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая, и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же, видевшие и не разумевшие, ниже положше в помышлении таковое, яко благодать и милость в преподобных Его и посещение во избранных Его.

## **На литии стихира храма.**

### **Слава, глас 2-й:**

**Приидите верных собори,/ псаломски восплещим руками,/ воспевающе в песнях духовных/ печальных утешительницу,/ о грешных к Богу молитвенницу,/ похвалу земли Беларуска, и Церкви Православныя украшение./ Ея же молитвами, Христе Боже,/ даруй миру велию милость.**

### **И ныне, глас тойже:**

**Деве Пренепорочная Всепетая,/ Мати Христа Бога нашего,/ Марие, Богоневесто неискусобрачная,/ верных предстательнице и утверждение,/ от всякия беды и нужды избавление,/ Богородице Владычице,/ спаси нас верою и любовью к Тебе прибегающия.**

### **На стиховне глас 1-й. Подобен: Небесных чинов:**

**Небесных чинов удивление,/ на земли иночествующим наставнице,/ печальных утешение и немощствующих укрепление,/ Манефо мати преподобная,/ моли Милостиваго Бога о иже любовь твою почитающих.**

**Стих: Дивен Бог во святых Своих/ Бог Израилев.**

**Кто по достоинству пети возможет/ высоту добродетели в житии своем явившую,/ Манефу преподобную,/ землю нашу светом благочестия просветившую,/ терпения столп и верных утверждение,/ и молитвенницу о душах наших.**

**Стих: Честна пред Господем/ смерть преподобных Его.**

**Преподобная мати Манефо,/ светло совершающе память твою/ воспеваем величие подвигов твоих,/ во трудех бо от юности Христу послужила еси,/ ангельския силы удививши терпением твоим,/ в постех, молитвах и богомыслии пребывала еси,/ темже и Духа Святаго обитель явилася еси,/ и молишия непрестанно о всех нас.**

### **Слава, глас тойже:**

**По долгу ублажаем тя,/ яко нашу похвалу и Церкви украшение./ Житие твое, Манефо, честно,/ и успение со святыми,/ просияла бо еси дела благими,/ и многих ко Христу привела еси./ Темже мы, с радостию ублажающе тя,/ припадаем к раце цельбоносных мощей твоих,/ со умилением глаголюще:/ молися за ны ко Господу/ да подаст душам нашим мир и велию милость.**

### **И ныне, богородичен, глас 1-й:**

**Се исполнися Исаиино проречение: / Дева бо родила еси / и по рождестве, яко прежде рождества, пребыла еси, / Бог бо бе Рождейся, темже и естества новопресече. / Но, о Богомати, / моления Твоих рабов, / в Твоем храме приносимая Тебе, не презри, / но яко Благоутробнаго Твоима рукама носящи, / на Твоя рабы умилосердися / и моли спастися душам нашим.**

### **Тропарь, глас 4:**

**Веселися земле Гомельская,/ се бо Господь яви дивную подвижницу,/ во тьме греховней яко солнце воссиявшую,/ и Евангелие людем, притекавшим к ней возвещавшую./ Ныне же нетленным телесем с нами пребывая,/ спасай нас молитвами твоими,/ Манефо, мати преподобная.**

### **НА УТРЕНИ,**

#### **по 1-м стихословии седален, глас 4:**

**Преподобная мати Манефо, моли Человеколюбца Бога, да избавит нас от всяких бед и напастей, и дарует нам живот вечный.**

#### **Слава, и ныне. Богородичен, глас 4:**

**Очисти нас, Человеколюбче, молитвами Роджшия Тя, и избави нас от всякия скорби и вечныя славы сподоби.**

**По 2-м стихословии седален, глас 4:**

**Гласу евангельскому последовала еси, преподобная, и землю нашу подвигом твоим освятила еси, темже и почитающим память твою точиши исцеления.**

**Слава, и ныне. Богородичен, глас 4:**

**Помилуй нас, Едине Человеколюбче Щедрый, молитвами Рождшия Тя: Ты бо еси Бог наш и Господь.**

**Полиелей. Величание:**

**Ублажаем тя, преподобная мати наша Манефо, и чтим святую память твою, наставнице монахинь и собеседнице ангелов.**

**По полиелеи седален, глас 4:**

**Приидите, преподобную велегласно хвалами почтим, ублажающе равноангельское житие ея, терпению в скорбех ея дивящиеся: та бо люди голодом слова Божия гиблющия, манною учения своего богомудренно напита, и молитвою своею, яко лучею солнечною просвети, от неяже и мы озарение приимше, благодарственно воззовем: радуйся, Манефо, мати преподобная.**

**Слава, и ныне. Богородичен:**

**Матерем и девам похвала еси, Владычице, рождающая Творца всяческих: Мати убо и Дева пребыла еси. Темже хваляще Тя, песнями немолчными величаем.**

**Таже степенна, 1-й антифон 4-го гласа.**

**Прокимен, глас 4-й: Честна пред Господем/ смерть преподобных Его.**

**Стих: Что воздам Господеву о всех, яже воздаде ми.**

**Евангелие от Матфея, зач. 43.**



## По 50-м псалме стихира, глас 6-й:

**Прославим, братие, Христа Бога нашего,/ посетившаго люди Своя/ и просветившаго землю нашу/ предстательством Манефы преподобныя,/ та бо есть скорая заступница и помощница/ и молитвенница усердная о душах наших.**

## Канон, глас 8-й, егоже краегранесие:

**Песнь хвалы поем тебе, о мати преподобная.**

### Песнь 1

**Ирмос:** *Воду прошед яко сушу, и египетскаго зла избежав, изральтянин вопияше: Избавителю и Богу нашему поим.*

**Пение похвальное приносим ти, мати преподобная, радостно: твоими бо молитвами избавляемся присно вражескаго нападения.**

**Елеем добродетели возжегши светильник свой, с мудрыми девами вошла еси, мати Манефо, в радость Господа твоего.**

**Силою молитв твоих, мати, отжени уныние греховное от чтущих твою святую память верно.**

**Богородичен:** **Небес превысшую и земнородных утверждение, воспеваем Тя, Пречистая, Бога бо Истиннаго во спасение наше родила еси.**

### Песнь 3

**Ирмос:** *Небесного круга Верхотворче Господи, и Церкви Зиждителю, Ты мене утверди в любви Твоей, желаний краю, верных утверждение, едине Человеколюбче.*

**Храм Духа Святаго соделалася еси, мати Манефо преподобная, сего ради и ныне мощи твоя благодать исцелений нам присно источают.**

**Верую твердою противостала еси сопротив искушений вражиих, о мати всечестная, и ныне нас укрепи, немощных в вере, да взирая на подвиги твоя прославляем укрепльшаго тя.**

**Ангельский образ** восприемшая, и иго Христовых заповедей на рамах понесшая, образ верным явилася еси, мати, в житии твоём.

**Богородичен:** Ликов ангельских превыши явилася еси, Владычице, Слово Отчее плотию рождши, и ныне нас немощных укрепи богоприятным твоим ходатайством.

#### **Седален, глас 4:**

**Память** твоя явльшися нам, озаряет концы богоразумия светом, преподобная мати Манефо, ты бо благочестия наставница и скорбящих утешительница и недугующих дивная целительница показала еси, законы Небеснаго Царя соблюди, и житием твоим веру православную утвердивши. Темже молитвами твоими избави нас от всяких лютых.

#### **Слава, и ныне. Богородичен:**

**Слово** Отчее на землю сниде, и ангел светел Богородице глаголаше: радуйся, Благословенная, Яже приемшая во чреве Превечнаго Бога и Господа, да от прелести, яко Бог, спасет род человеческий.

#### **Песнь 4**

**Ирмос:** *Услышах, Господи, смотрения Твоего таинство, разумех дела Твоя и прославих Твое Божество.*

**Преподобных** лика сопричастнице, подвигом добрым подвизалася еси, и явилася еси воистину всех скорбных скорая утешительница.

**Образом** жития твоего присно ободряй малодушныя, мати преподобная, и молитвами твоими сохраняй от бед всех любовь чтущих тя.

**Единаго** Бога всею душею возлюбила еси, и Тому Единому последовала еси, и нас научи, мати преподобная, заповеди Его соблюдать.

**Богородичен:** Многия щедроты Твоя, Дево Богородице, яви богато на рабех Твоих, избавляющи нас будущаго и страшнаго суда.

## Песнь 5

**Ирмос:** *Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.*

**Телесныя скорби мужественно понесши и терпение нерушимое в болезнях показавши, мати Манефо преподобная, венцем победы увенчалася еси от Венцедавца Христа.**

**Егда прииде время лютое, яви тя Христос, мати преподобная, яко свещу на свещнице добродетелию горящую, во тьме безбожия блуждающим.**

**Божественным Духом просвещенная, и мудростью Вышняго осененная, утешала еси души страждущих, любовью своею веру в сердцах их возжигаящи.**

**Богородичен:** **Едина рождши Жизнь божественную, и всем спасение Дающаго, о спасении нашем благодать Его умоли и страстей наших восстание пресецы.**

## Песнь 6

**Ирмос:** *Молитву пролию ко Господу, и Тому возведу печали моя, яко зол душа моя исполнися, и живот мой аду приблизися, и молюся яко Иона: от тли, Боже, возведи мя.*

**Одожди росу благодати твоя, Манефо преподобная, на почитающия тя верою и любовью, и молитвами твоими общники Горняго Царствия учини.**

**Мрака греховнаго избави нас предстательством твоим, и к истинному покаянию настави, совершающих твою память, Манефо богоблаженная.**

**Адамант веры и терпения явилася еси, мати преподобная, тесным бо путем в Жизнь Вечную вошла еси, и ныне молися Господу во еже спастися нам.**

**Богородичен:** **Тя Богородице Чистая, призываем верно: смиренныя наши души соблюди, и избави нас пламене мучения, и тьмы вечныя.**

## Кондак, глас 6:

**Измлада претерпела еси страдания телесныя, приведшия тя дивно ко Христу, и в чине Ангельстем Господеви послужила еси, Манефо славная, просвещающи люди во мраце неверия сидящия. И ныне моли Христа Бога спастися душам нашим.**

## Икос:

**Аще и на небеси пребываеши, преподобная мати Манефо, обаче и земных не оставляеши. Мы же чада твоя, любовью движими, венец похвалы тебе приносим днесь, и величие подвигов твоих воспевающе, усердно взываем: моли Христа Бога спастися душам нашим.**

## Песнь 7

***Ирмос: От Иудеи дошедше отроцы, в Вавилоне иногда, верую Троическою пламень пещный попраша, поюще: отцев Боже, благословен еси.***

**Истинныя веры проповедница была еси, мати славная, и образом жития твоего многих ко Христу привела еси, темже и нас в добродетели убогих укрепи, крепким твоим к Богу предстательством.**

**Память твоя, преподобная мати, подвизает нас по долгу песнословити тя, заповеди бо вся Христовы яко едину исполнила еси, Манефо славная.**

**Раку честных мощей твоих любовью целующе, яко живеи ти сущей с нами глаголем радостно: вознеси о нас молитвы твоя ко Господу, Егоже престолу духом предстоиши ныне.**

**Богородичен: Егда восхощет душа моя разлучатися окаяннаго моего телесе, невидимых враг томительства избави мя, Богоневестная.**

## Песнь 8

**Ирмос:** *Царя Небеснаго, Егоже поют вои ангельстии, хвалите и превоносите во вся веки.*

**Пение** всеумиленное возглашаем ти, мати Манефо, радостно: избави молитвами твоими град твой и люди, иже верою память твою совершают присно.

**Омраченную** страстьми душу мою, молитвою твоею озари, преподобная, и от тьмы греха изведи мя, наставляя к свету заповедей Господних, ходатайством твоим.

**Добродетелей** верха достигла еси в житии твоём, и страстей лукавых избегла еси, мати Манефо, вразуми и нас не ино что ведети, точию Христа распята.

**Богородичен:** **О**калях грехми многими душу мою окаянный, всю же душетленными страстьми оскверних плоть, но яко Чистая же и Нескверная, Ты мя очисти множеством милости Твоея.

## Песнь 9

**Ирмос:** *Воистину Богородицу Тя исповедуем, спасеннии Тобою, Дево Чистая, с бесплотными лики Тя величающе.*

**Белыя Руси** похвало и украшение, и Церкви Православныя чадо избранное, присно поминай нас, мати преподобная, святую память твою почитающих.

**Ныне** веселится земля Гомельская, торжествует же Церковь Беларуская, имущи в себе великое сокровище, многоцелебныя мощи Манефы преподобныя.

**Ангельский** образ восприявши на земли, ангельским ликом сочеталася еси на небеси ныне, мати Манефо, и ныне прими наше недостойное моление, и ходатайствуй пред Господем за чтущих тя.

**Богородичен:** **Я**же Едина в напастех и скорбех защищающая, Пречистая, под кров Твой прибегающих тепле, и ныне прими, яко Преблагая, яже от сердца нашего моления.

**Светилен:**

**Манефо** преподобная, предстоящи ныне престолу Божию, молися получить милость всем поющим тя, и чтущим память твою верно, яко да усты и сердцем прославим Христа Светодавца.

**Слава, и ныне:**

**Пречистая Владычице**, надеждо наша твердая, Ты истинную Богородицу любовию чтущия, сохрани от всех бед.

**На хвалитех стихиры, глас 5.**

**Подобен: Радуйся:**

**Радуйся** мати преподобная, / благочестия великая ревнительнице, / Церкви славо, / верных утверждение, / безбожных посрамление, / еюже неверие разорися и упразднися / и попрося лести держава / и вознесохомся от земли к небесным. / Ангелом собеседнице, / инокам наставнице, / благоуханный крине, / преподобных яко воистину удобрение. / Христа моли // низпослати душам нашим велию милость.

**Радуйся** преподобная мати Манефо, / цвет благовонный, рая краснейший, / иго благое Христово / на рамах своих понесшая, / на высоту добродетелей восшедшая / и плод мног Богу принесшая, / приснотекущая реко духовная, / верная присно напояющая, / наставнице премудрая, / к Богу теплая молтвеннице, / путеводительнице к вышним, / святых лика сопричастнице! / Христа моли // низпослати нам велию милость.

**Радуйся** преподобная Манефо, / трисолнечным светом озаренная, / земныя тверди солнце, / помраченных прозрение, / недугующих исцеление, / согрешающих исправление, / отчаявшихся укрепление, / во вражде сущих примирение, / и всеобщее к Богу присвоение, / духовныя мудрости источнике живоносный, / молитвы чистое обиталище! / Божественному

**престолу славы предстояще, / Христа моли // даровати душам нашим велию милость.**

**Радуйся преподобная мати Манефо, / Церкви похвало и украшение, / столпе благочестия, / земли наша славное прозябение, / наставнице спасения, / Христовы люди просветившая своими наставлениями, / и различными добродетельми воспитавшая, / благодати проповеднице, / закона Божия исполнительнице, / величие терпения явившая, / глубину смирения открывшая! / Христа моли // даровати душам нашим велию милость.**

**Слава, глас 8:**

**Преподобных жен лика украшение, / и земли Беларуския просвещение, / в песнях почитим, вернии, / преподобную Манефу славную, / и Христу возопиим радостно: / Благоутробне Господи, / подаждь людем Твоим, молитвами преподобных, // оставление грехов и велию милость.**

**И ныне, глас тойже:**

**Владычице, прими молитвы раб Твоих / и избави нас // от всякия нужды и печали.**

